

四庫全書

集部

欽定四庫全書

集部

石湖詩集卷

二十至
二十四

詳校官庶吉士_臣陳若霖

主事_臣呂雲棟覆勘

總校官庶吉士_臣何思鈞

校對官編修_臣勵守謙

謄錄監生_臣蔣繼熊

欽定四庫全書

石湖詩集卷二十

宋 范成大 撰

淳熙五年四月二日直宿玉堂懷舊二絕句

桂海冰天老歲華
直廬重上玉皇家
當年曾識青青鬢
惟有東牆一架花

雪山刀斗不停撾
夜把軍書敢顧家
珍重玉堂今夜夢
靜聞宮漏隔宮花

初歸石湖

曉霧朝曦紺碧烘，橫塘西岸越城東。
行人半出稻花上，宿鷺孤明菱葉中。
信脚自能知舊路，驚心時復認鄰翁。
當時手種斜橋柳，無限鳴蜩翠埽空。

寄蜀州楊道人

老來萬事總蕭然，猶憶西州暑雪邊。
為報岷峨山水道，如今真箇得歸田。

送同年萬元亨知階州

老我曾願萬里春
憐君飛棹也浮秦
當年千佛名經裏
又見西遊第二人

路入南山舊漢畿
油油清渭照牙旗
古來百戰功名地
正是雞鳴起舞時

十年關隴困科輸
聖德如天盡埽除
臨遣中和二千石
好乘春日下寬書

次韻蜀客西歸者來過石湖并寄成都舊僚

走徧塵埃倦鳥還
故鄉元在水雲間
黃梁飯裏夢魂醒

金匱山先生集 卷二十
青箬笠前身世閒鷗鷺飛來俱玉立松篁歲晚各蒼顏
岷峨交舊如相問鐵鎖無扃任客攀

十一月大霧中自胥口渡太湖

白霧漫空白浪深舟如竹葉信浮沉科頭晏起吾何敢
自有山川印此心

靈祐觀

即古神景宮也相傳舊宮廊百間繞三大殿謂之百廊三殿今不復有堂前有垂絲

檜三本

賜谷西門鎖洞宮古苔斑駁檜蒙茸百廊三殿惟胥井

萬壑千巖有瘦筇

林屋洞

仙經一名左神幽虛洞天正洞門左觀中出觀左門又有二門一名雨洞一名暘谷

洞

擊水搏風浪雪翻煙銷日出見仙村
舊知浮玉北堂路
今到幽墟三洞門
石燕翔飛遮炬火
金籠深阻護嵌根
寶鐘靈鼓何須叩
庭柱宵晨已默存

包山寺

在毛公壇前別峯下慈受深老所作深老入山時手植二竹今遂成林山上松多非

種植風吹松子自成謂之飛松

仙塢遜半坐精廬遷古幢
檣衲昔開山至今坐道場
熾然說慈忍禪海薰戒香
穉竹暗寒碧飛松盤老蒼
船鼓入宴坐紅塵隔滄浪
藤杖嬾歸去共倚蒲團牀

毛公壇福地

西山最深處毛公劉根也身生綠毛故云有劉道人作小菴在隱泉之上

松蘿滴翠白晝陰七十二峯中最深綠
毛仙翁已仙去惟有石壇留竹塢
竹陰埽壇石槎牙漢時風雨生蘚花
山中笙鶴尚遺響湖外人煙驚歲華
道人眸子照秋色邀我分山築丹室
驅丁役甲莫兒嬉渴飲隱泉饑餌木

上方寺

在銷夏灣上

檣棹古銷夏，捲箔新上方。
珠灣銷員折，冰鏡沉空光。
楓

纈醉晴日，橘黃明。蚤霜閉門松竹徑，隨處有清涼。

銷夏灣

吳王避暑處，平湖猶山一灣，雲水勝絕。

蓼磯楓渚故離宮，一曲清漣九里宮。
縱有暑光無著處，青山環水水浮空。

橘園

橘中有佳人，招客果下游。
胡牀到何許，坐我金碧洲。
沉

沉剪綵山垂垂萬星毬奇采日中麗生香風外浮折贈
黃團雙珍逾桃李投折開甘露囊快吸冰泉甌熱腦散
五濁豈止沉疴瘳未知商山樂能如洞庭不

華山寺

在西山盡處多泉泓僧房數處有之有湯
岐公胡茂老樞密孫仲益尚書諸公題詩

五湖西岸孤絕處旃檀大士來同住性空真水徧清涼
隨緣出現無方所蒙泉新潔鑑泉明淪茗羹藜甘似乳
何須苦問蓮開未桂子萼花了今古三翁綵筆照青霞
從此他山都不數我今閒行作閒客暫借雲窓解包具

魂清骨冷不成眠，徹曉跼踖聽粥鼓。
脚力有餘西塢盡，明日灣頭更鳴櫓。
却上東山喚德雲，別峯應在銀濤許。

縹緲峯

西山最高峯

滿載清閒一棹孤，長風相送入仙都。
莫愁懷抱無消豁，縹緲峯頭望太湖。

鎮下放船過東山二首

打頭風急鼻雷鼾，醉夢閒心鐵石頑。
惟有愛山貪未厭，西山纔了又東山。

老禪竿木各逢場詩客端來共葦航
一任顛風聒高浪
滿船歡笑和詩忙

翠峯寺

在東山雪竇顯老道場山半有悟道井庭
下大羅漢木兩株虬屈蟠壯甚奇古

來從第九天橘社繫歸船
借問翠峯路誰參雪竇禪
應真庭下木說法井中泉
公案新翻出諸方一任傳

社山放船

社下鐘聲送客船
凌波撾鼓轉滄灣
橫煙裊處雞豚社
落日濃邊橘柚山
八表茫茫孤鳥去
萬生擾擾一舟閒

湖心行路平如鏡
陸地風波却險艱

東山渡湖

渡船帆飽如張弓
倏忽世界寒泚融
堪與無垠日夜汎
浩浩元氣蓬蓬風
湖光日色不可辨
但見水精火齊合
集成虛空波臣川
后敬愛客約束祕
怪驅魚龍大千總
作大圓鏡光中飛
度迷西東蒼茫一
身無四壁八方上
下惟孤蓬毛仙出
迎笑相問何乃自
苦荒寒中吾生蓋
頭之片瓦到處漂
搖稱寓公猶嫌塵
土礙人眼茲遊勝

絕餘難同九卿車馬恍昨夢付與一笑隨飛鴻

與游子明同過石湖

契闊相逢一笑歡當年森桂共驂鸞試談舊事醒村酒
仍趁新晴暖客鞍梅粉都皴啼宿雨柳黃不展噤春寒
從今鼎鼎多幽事仍喜蛙聲不在官

次韻同年楊廷秀使君寄題石湖

儀凰當瑞九韶成何事栖鸞滯碧城公退蕭然真吏隱
文名藉甚更詩聲句從月脇天心得筆與冰甌雪椀清

書到石湖春亦到平堤梅影穀紋生

半世輕隨出岫雲如今歸作臥雲人
小山有賦招遊子大塊無私佚老身
禪版夢中千嶂晚鬢絲風裏萬花春
新年杜窠鶯黃滿賸醉田頭紫領巾

自閩門騎馬入越城

日影穿雲亦未濃夜來疎雨洗清空
村前村後東風滿略數桃花一萬重

斷橋隕岸數家村雨少晴多減漲痕
雪白鶯兒綠楊柳

日高猶自掩柴門

姚夫人輓歌詞

衿悅虞鰥後詩書孟母鄰高懷琴意靜晚福詔恩新自
古悲風木于今詠澗蘋松銘無溢美百世考堅珉

北山草堂千巖觀新成徐叔智運使吟古風相賀
次韻謝之

北山松竹堪怡顏千巖觀前多好山誰云都無卓錫地
亦尚有此茅三間洞門無鑰常不關小徑百曲蒼龍盤

衆芳述人不知處片雲與我俱忘還花前一杯重斟呂
明日戽田并灌圃種苗種豆從此忙昨夜驚雷送膏雨

贈舉書記歸雲丘

一枕清風四十霜孤生無處話淒涼相看只有龐眉客
還在雲丘舊草堂

四股澗松雷斧碎十圍巖桂燒痕枯不知堦下跳珠處
舊竹春來有筍無

青山面目想依依水石風林入夢思白髮蒼顏心故在

只如當日看山時

題查山林氏菴

戶庭清深宅翠微
雪如佳壁喚題詩
煙梢矗矗青圍屋
露葉鮮鮮綠滿籬
宿雨一春纔汎鴨
新蕪幾日已藏碑
山僧見客如枯木
疑是懶殘南嶽師

木瀆道中風雨震雷大作

惡風奔雲何壯哉
溪水欲立山欲摧
石岸迸裂纜邊樹
胡牀動搖船底雷
靈巖塔後雨脚挂
胥口廟前浪花來

篷漏衣沾不足惜酒瓶傾倒愁空壘

光福塘上

指點炊煙隔莽蒼午餐應可寄前莊雞聲人語小家樂
木葉草花深蒼香春去已空衣尚絮雨來何晚稻初芒
祇今農事村村急第一先陂貯水塘

與至先兄遊諸園看牡丹三日行徧

桂杖無邊處處過粉圍紅繞奈春何閭門昨日看不足
今日婁門花更多

蜂蝶蕭騷草露漫
小家籬落閉荒寒
欲知國色天香句
須是倚闌燒燭看

次韻同年楊使君回自毘陵同泛石湖舟中見贈
客舫中流下人家夾岸看
落花堆錦煖吳藕鏤冰寒
莫厭清歡暫須知後會難
小詩煩本事任禿絛毫端

曲誤不須顧客狂
當好看日斜雙槳急
風駛夾衣寒
臘說歸田樂
休歌行路難
石湖三萬頃何處覓憂端

北渚乘風渡西山帶霧看
袖單嫌翠薄杯淺怯金寒
宿

雨收金易春醒解却難且留行色住重肯過蘇端

頃乾道辛卯歲三月望夜與周子充內翰泛舟石
湖松江之間夜艾歸宿農圃距今淳熙己亥九
年矣余先得歸田復以是夕泛湖有懷昔遊賦
詩紀事

石湖花月浮春空憶共仙人同短篷三更半醉吹笛去
櫂入濕銀天鏡中鶴鳴喚歸斗未沒却步扶疎花底月
不知行到碧桃邊但見天風吹積雪月圓月缺今幾回

依舊滿湖金碧堆仙人還上玉堂宿合有片時清夢來
一笑流光飛電抹嫦娥相對兩愁絕桂枝應亦老無花
蟾兔不須疑鶴髮

嬾牀午坐

晴霄垂北窓卧我翠幄中不知幾斧鑿成此太虛空前
雲稍過盡後雲來無窮鳥雀有底忙激彈過牆東不如
雙飛蝶欸欸弄微風我亦困思生拋書眼蒙茸

秋前三日大雨

暑殘堪喜亦堪憎
恰似沙場喋血兵
縱有背城餘燼在
能禁幾度瀉檐聲

秋前風雨頓涼

秋期如約不須催
雨脚風聲雨快哉
但得暑光如寇退
不辭老景似潮來
酒杯觸撥詩情動
書卷招邀病眼開
明日更涼吾已卜
暮雲渾作亂峰堆

立秋後二日泛舟越來溪三絕

西風初入小溪帆
旋織波紋縐淺藍
行入闌荷無水面

紅蓮沉醉白蓮酣

一川新漲慰秋光
挂起篷窗受晚涼
楊柳無窮蟬不斷
好風將夢過橫塘

飯後茶前困思生
水寬風穩信篙撐
不知浪打船頭響
聽作淩波解佩聲

采菱戶

采菱辛苦似天刑
刺手朱殷鬼質青
休問揚荷涉江曲
只堪聊誦楚詞聽

曉起聞雨

老來稍喜睡魔清
兀坐枯株聽五更
蕭索輪困憐燭燼
飛揚跋扈厭蚊聲
登高事了從教雨
刈熟人忙却要晴
莫道西成便無慮
大須濃日曬香秔

說虎軒夜坐

白雲深處卧癡頑
挂起東窻水月寬
但得好詩生眼底
何須寶刹現毫端
一身莫作官身想
萬境都如夢境看
解舍鄰翁能日醉
呼來分與一蒲團

偶書

太行巫峽費車舟，休向滄溟認一漚。
日下冰山難把玩，雨中土偶任漂流。
元無刻木牽絲技，但合收繩卷索休。
惟有酒缸并飯甑，却須秔秠十分收。

睡覺

漏箭聲中斷角哀，界窻猶有月徘徊。
心兵休為一蚊動，句法却隨孤鴈來。
漱罷玉池甘似醴，夢餘金鼓辯如雷。
夜長展轉添許事，推枕蕭然一笑咍。

閬門行送胡子遠著作守漢川

前年送君朝明光今年送君還故鄉錦官樓上一樽酒
萬里閬門折楊柳吳波沄沄蜀山蒼人生行路如許長
相逢相送鬢如雪人生能禁幾離別房湖風月開春臺
石湖水雲歸去來西棹東帆君未了相逢還向閬門道

嘲蚊四十韻

暑魃方肆行羽孽亦厲習肖翹極么魔坎圯累關翕濕
生同蜚蠊腐化類宵熠初來鬧郭郭少進亘原隰嚶如

蠅聲覺聚若螽羽揖俄為殷雷聞遂作密霰集口銜鋼
針鋒力洞衲衣襲啾聲先計議著肉便噓吸立豹猶未
定卓錫已深入血隨姑噉升勢甚轆轤汲沉酣尻益高
飽滿腹漸急晶晶紫蟹眼滴滴紅飯粒拂掠倦體煩爬
搔痒肌澁抹束不虞西擒一已竄十新癢蓓蕾漲宿暈
斑斕浥竟夜眠轉展連牀歎於悒云何人戚欣乃係汝
張歛驅以葵扇風熏以艾煙濕繁長鎮藏遮帳隙亟補
葺火攻憚穢臭手拍嬾腥汁伏翼佐婦除網蛛助收拾

薄暮洵交攻大明訐未戢牛草厚逾羶鱉介鉅勝鉞遭
汝若欲困嗟人何以給夏蟲雖衆多罪狀相百什蜂螫
豈房櫳蟣蝨但禪褶羊羶蟻登俎驥逸蟲附帛蠓惟舞
醺瓮蟬止崇書表蚤爲鴿所撮蠅亦虎能執彼愆可貫
死汝罪當獻級涼颿倏然至醜類殆哉爰一吹背吻破
再鼓翅翎繫三千蹠頡利百萬走尋邑快哉六合內蔑
有一塵立虛空旣清凉家巷得寧輯雞窻夜可誦蛩機
曉猶織雨簾繡浪卷風燭淚珠泣客來添羽觴人靜拂

塵笈恍還神明觀似啓坏戶蟄消長誰使然智力詎能
及

閭門戲調行客

日夜飛帆與跨鞍閭門川陸路漫漫人生自苦身餘幾
天色無情歲又寒萬事惟堪六如觀一杯莫信四并難
重陽雖過黃花少尚有遲開玉雪團

九月二十八日湖上檢校籬落

村北村南打稻聲荒園屐齒亦嬉晴荊邊更覺朝陽好

松下偏聞晚吹清一歲無非吾樂事千金不博此閒行
周遭踏徧芙蓉岸足痺腰頑栩栩輕

晚步吳故城下

意行殊不計榛菅風袖飄然勝羽翰挂杖前頭雙雉起
浮圖絕頂一鷗盤醉紅匝地斜曛暖熨練涵空漲水寒
却向東臯望煙火缺蟾先暎榭林丹

上沙田舍

更無雲物起微陰攏畝人家各好音歲晚陽和歸稻把

夜來霜力到楓林
兒童笑裏豐年面
烏鳥聲中落日心
釀秫炊秬都入手
賸拚腰腳辦登臨

與現壽二長老遊壽泉因話去年林屋之遊題贈
何年錫杖刷清甘
天遣深源壽此菴
金鑿萬枝浮倒影
為君題作菊花潭

松風放浪入雲關
二衲相從一士閒
人與瘦筇俱老健
去年今日在包山

渡太湖

囊風閣雨半晴陰慘淡誰知造化心
委命浮沉惟一葉計身輕重亦千金
紅塵猶道不勝險白浪莫嗔如許深
晚得薌山堪寄纜卧聽鼉吼與龍吟

再渡胥口

古來此地快蓬心天繞明湖日照臨
一鴈雲平時隱現兩山波動對浮沉
衰髯都共荻花老醉面不如楓葉深
簪戶釣徒來問訊去年盟在肯重尋

跨馬過練墟喜晴

稻穗初乾怕雨時
晚來蒸爇欲霏微
西風若肯吹雲盡
不惜飄飄側帽歸

晚歸石湖

何須駟馬銜鄉關
只作歸農老圃看
夢裏曾腰綰結佩
年來新著情遊冠
和煙種竹聊醫俗
帶月聞蛙不在官
久矣此心恬不動
如今併與此身安

北山堂開爐夜坐

困眠醒坐一龕多
竹洞無關斷客過
貪向爐中煨榾柮

懶從掌上看菴摩閒無雜念惟詩在老不甘心奈鏡何
八萬四千安樂法元無祕密可伽陀

入城

十里清風一餉閒片帆真欲解人顏林家莊近聞鷺鴨
船到閭門儘未關

儘字俗用已久據理只合用盡字

次韻蚤蚊

羽蟲么魔塞區寰造化胡為弗疾頑長養汙泥草木處
縱橫大地山河間夜聲雷動人力屈秋喙花開天理還

但願江湖無白鳥何須金鼎鑄神姦

冬至晚起枕上有懷晉陵楊使君

新衣兒女鬧燈前夢裏莊周正相然騎馬十年聽曉鼓
人生元有日高眠

多稼亭邊有所思冬來撚却幾行髭也應坐擁黃紬被
斷角孤鴻總要詩

寒雨

何事冬來雨打窻夜聲滴滴曉聲淙若為化作漫天雪

徑上孤篷釣晚江

戲贈脚婆

日滿東窻照被堆宿窻猶自煖如煨尺三汗脚君休笑
曾踏鞢霜待漏來

除夜前二日夜雨

雪不成花夜雨來壠頭一洗定無埃小童却怕溪橋滑
明日先生合探梅

次韻章秀才北城新圃

方流桃花塢窈窕入壺天
碧城當巖岫清灣如澗泉
風月欲無價聊費四萬錢
雪後春事起紅雲蜂蝶邊

西城如西塞桃花古來多
釣艇鰕魚肥前身張志和
煙霏幾白鷺風雨一綠蓑
清江韻新引清絕勝陽阿

夢中作

漠漠人間一氣平
虛無宮殿銷飛瓊
碧雲萬里海光動
何處書來金鶴鳴

北城梅為雪所厄

凍藥粘枝瘦欲乾
新年猶未有春看
雪花祇欲欺紅紫
不道梅花也怕寒

雪後六言二首

雨聲和深巷
屐風力到短檠
燈可惜滴殘檐
雪從教漂盡河冰

歲寒破屋萬卷風
急踈窻一燈高
卧眼生醉纈
遠遊鬚有堅冰

元夕大風雨二絕

東風無賴妒華年一夜淒寒到酒邊
放盡珠簾遮畫炬
莫教檐雨濕青煙

河傾海立夜翻盆不獨妨燈更損春
凍澁笙簧猶可耐
滴皺梅頰勢須嗔

春懷

柳顰梅笑各相惱詩債棋讎俱見尋
莫道幽居無一事
春來風物總關心

自橫塘橋過黃山

陣陣輕寒細馬驕竹林茅店小帘招東風已綠南溪水
更染溪南萬柳條

次韻謝李叔玠追路送筍

墮地錦裯解衣溫玉姿來償食竹債大勝伏雌炊少
日羹藜子老來煨芋師盤餐登異味指動已先知

石湖詩集卷二十

欽定四庫全書

石湖詩集卷二十一

宋 范成大 撰

秀州門外泊舟

拍岸清波撲岸埃，黑頭霜鬢幾徘徊。
禾興門外官楊柳，又見扁舟上堰來。

臨平道中

煙雨桃花夾岸栽，低低渾欲傍船來。
石湖有此紅千葉，

前日春寒總未開

夜過越上不得遊覽

王程公事兩相催衝雨片帆連夜開千巖萬壑在何處
山陰道中無好懷宜有酒船尋賀老興盡那能訪安道
鑑湖春色漫芳菲付與青青湖畔草

道中古意二絕

桃李寂無言垂楊照溪綠不見苧蘿人空吟若邪曲
浣紗寂不好辛苦觸戰箭東施無麗質安穩嫁鄉縣

觀楔帖有感三絕

古人賦多情無事輒愁苦蘭亭一觴詠感慨乃如許
寶章糴九泉摹本範百世白鶩滿波間誰識腕中意
三日天氣新楔飲傳自古今人不好事佳節棄如土

浙東舟中

處處槿樊園家家桃廡門魚鹽臨水市煙火隔江村雨
過張帆重潮來汲井渾彎路短蓬底休說兩朱轡

初赴明州

四征惟是欠東征行李如今忽四明海接三韓諸島近
江分七堰兩潮平擬將寬大來宣詔先赴清和去勸耕
頂踵國恩元未報驅馳何敢歎勞生

昌國縣圖障於海中題字云自此與

高麗國接界蓋
宇內極東處也

寄虎丘範長老

誰云簪紱坐成禽亦漫為官漫好音身已備嘗生老病
心何曾住去來今一波不動月空照萬籟無情風自吟
持此東歸似同志故應分我半山林

次韻汪仲嘉尚書喜雨

雨雲渾似雪雲同天意人心本自通吏役驅驅騎馬滑
何如欹枕閉門中

老身窮苦不須憂未有毫分慰此州但得田間無歎息
何須地上見錢流

曉起

窻明驚起倒裳衣鈴索頻搖定怪避即入簿書叢裏去
少留欹枕聽黃鸝

大風

四明亦有颶風

颶母來從海若家
青天白地忽飛沙
煩將殘暑驅除盡
只莫顛狂損稻花

大黃花

大芋高荷半畝陰
玉英危綴碧瑤簪
誰知一葉蓮花面
中有將軍劒戟心

進修堂前倚池

方池留水勝埋盆
露入蓮腮沁粉痕
鈴索無聲人不道

小禽飛入鬧荷根

州宅堂前荷花

凌波仙子靜中芳也帶酣紅學醉粧有意十分開曉露
無情一餉斂斜陽泥根玉雪元無染風葉青蔥亦自香
想得石湖花正好接天雲錦畫船涼

新荔枝四絕

荔浦園林瘴霧中戎州沽酒擘輕紅五年食指無占處
何意相逢萬壑東

海北天西兩鬢蓬
閩山猶欠一枝筇
鄞船荔子如新摘
行脚何須更雪峰

甘露凝成一顆冰
露穠冰厚更芳馨
夜涼將到星河下
擬共嫦娥鬪月明

趙泊飛來不作難
紅塵一騎笑長安
孫郎皺玉無消息
先破潘郎玳瑁盤

四明海舟自福唐來順風三數日至
得荔子色香都未減大勝戎涪間所

產莆陽孫使君許寄蜜荔過期不至貳
車潘進奏餉玳瑁一種亦佳并賦之

角東道院午坐

一夜西風轉酒旗
午餘殘暑不多時
綠荷半蝕霜前葉
丹桂全封雨後枝
忙裏有詩償日課
老來無賦為秋悲
梳頭小隸那知此
強向窻前數鬢絲

東門外觀刈熟民間租米船相銜入城喜作二絕

菊蕊杞棘爨無煙
日日文書橫索錢
今日甬東官況好

東津門外看租船

文書謂諸司督逋者

潮到靈橋綠繞船
海邊力穡屢豐年
淡青山色深黃稻

恰似胥門九月天

探木犀

秋半秋香花信遲
攀枝擘葉看纖微
昨朝尚作茶槍瘦
今雨催成粟粒肥

九月五日晴煖步後園

海氣烘晴入斷霞
半空雲影界山斜
輕羅小扇游蜂畔
只比東風有菊花

九日憶菊坡

菊坡長恨隔橫塘
城郭山林自不雙
放棹松江花已遠

濤江之外更鄞江

重陽九經堂作

俗間佳節自怱怱老去悲秋又客中青嶂捲簾三面月
黃花吹鬢幾絲風十年故國新栽柳萬里他鄉舊轉蓬
誰與安排今夜夢片帆飛到小籬東

真瑞堂前丹桂

血色凡花太俗生花工新意染秋英袍紅太重韉紅淺
畫不能摹句寫成

官忙風月鎮長閒
開遍香紅酒尚寒
若要與花相領略

千巖隨分有闌干

石湖千巖觀前
手植丹桂二畝

題羔羊齋外木芙蓉

慵粧酣酒夕陽濃
洗盡霜痕看綺叢
綠地團花紅錦障
不知庭院有西風

進思堂夜坐懷故山

塵事潮來不可推
身如病鶴強褰毳
簿書遮斷尋詩路
風雨驚殘問月杯
想得竹門無客到
直須雪夜有船迴

鱸鄉望眼雙明處祇欠凌霄萬仞臺

楊少監寄西征近詩來因賦二絕為謝詩卷第一

首乃石湖作別時倡和也

柴門重客醉中歸尚憶揮毫索紙時何物與儂供不朽
西征卷首石湖詩

錦囊隨上越王臺天海風濤亦壯哉書到嶺頭梅恰動
一枝應伴一篇來

羔羊齋小池兩涘木芙蓉盛開有懷故園

洞戶掩秋深畫橋橫晚靜嬋嬋芙蓉風池光弄花影懷
我白鷗邊錦帳繚千頃明河拍岸平紅綠染天鏡釣船
無畔岸收拾入簿領牆藩束院落寒窘令人瘦

鹿鳴席上贈貢士

登陸由來說四明台星光處更魁星海濱二老尊周室
館下諸生右漢廷秋賦重增人物志春闈俱上佛名經
一飛好趁扶搖便咫尺西興是北溟

大廳後堂南窻負暄

萬壑無聲海不波一窻油紙暮春和醉眠陡覺甍簷
圍坐翻嫌楫楸多水煖玉池添漱燕花生銀海費揩摩
端如擁褐茅檐下祇欠烏烏擊缶歌

晚步北園

刮地晴飈退海痕出門無扇可障塵麥粘瘠土何時雪
梅糝踈林昨夜春天鏡風煙疑夢事鬢霜時節尚官身
裏章束帶朝還暮慚愧青鞋紫領巾

謝賜臘藥感遇之什

鴻寶刀圭下九關十年長奉璽封看扶持蒲柳身猶健
收拾桑榆歲又寒天地恩深雙鬢雪山川途遠一心丹
疲毗疾苦今何似拜手歸來愧伐檀

立春後一日作

浮生萬法本悠哉大笑羲娥轉轂催官事已邀癡作伴
春風應共老俱來雲容雪意將詩問柳眼花心待酒媒
九十韶光天不斷人間笑口自難開

春前十日作

臘淺猶賒十日春
官忙長愧百年身
雪催未動詩無力
愁遣還來酒不神
節物何曾欺老病
書生自慣說悲辛
終期戚促成何事
今古紛紛一窖塵

三江亭觀雪

陰山陽朔雪中迴
行到天西玉作堆
乘興却遊東海上
白銀宮闕認蓬萊

懷歸寄題小艇

日出塵生萬劫忙
可憐虛費隙駒光
若教閒裏工夫到

始覺淡中滋味長歲晚角巾思芋栗年來手版愧耕桑
松風蘿月須相信春水深時上野航

雪後雨作

瑞葉飛來麥已青更煩膏雨發欣榮東風不是厭滕六
却怕雪天容易晴

再雪

銀竹方依檐住瑤花又入簾窺一白本憐麥瘦重來應
為梅遲

立春日陪魏丞相登三江亭

佳節登臨始此回，聊從晡曉靄望蓬萊。
水分江北渡頭去，風自海東潮外來。
太白天寒猶帶雪，十洲池煖已浮醅。
一尊往酹發船鼓，我亦歸帆相次開。

寄題鹿伯可見一堂

夢覺春闌俱轉蓬，仙凡今隔玉霄東。
聊攀鐵鎖問何似，豈敢避堂邀蓋公。

生來於君一歲長，決去愧我三年遲。
今世誰不落第二

著鞭尚續堂中詩

雪溪興盡船當迴却擬登陸遊天台經行見一堂前路
轉入湖山尋悞來

將赴建康出城

牒訴繽紛塞甕天經年癡坐兩三椽出門納納乾坤大
依舊青山繞畫船

寺莊

大麥成苞小麥深秋田水滿綠浮針今年一飽全無慮

寬盡歸舟去客心

育王方丈

窻紙悲嘶萬壑風
石梁飛澗倒枯松
因勤昨夜三更雨
添作投淵雪色龍

鰻井

決梵神通未易論
雨聲留客夜翻盆
不辭客路春泥滑
且足秧田舊水痕

妙喜泉

二士共談碑上法
千僧同酌沼中泉
法門泉味知多少
水桶繩頭一串穿

明月堂

古來禪窟銷巖扃
拂子崔嵬拄杖橫
塔上佛光堂上月
莫言公案不分明

自育王過天童松林三十里

竹輿窈窕入蕭森
逗雨梳風冷客襟
翠錦屠蘇三十里
不知脚底白雲深

香山

抖擻軒裳一闋塵任教空翠滴烏巾
老身已到籃輿上處處青山是故人

育王望海亭

海雲晝靄日龍葱案指光中萬象空
想見蓬萊西望眼也應知我立長風

天童三閣

千佛羅漢善財

松蘿暮天墮空翠迎面風香三千里
曾宮亭亭隔瑤水

碧瓦瓊櫺五雲裏千佛當門無半偈聲聞未解祖師意
徧參踏破青鞋底前樓後閣玲瓏起閒客那知如許事
東齋聽雨爛熳睡覺來一轉聊布施普請雲堂來擬議

石湖詩集卷二十一

欽定四庫全書

石湖詩集卷二十一

宋 范成大 撰

送江朝宗歸括蒼

半生三解后相看成老翁詩情故峩嶷袖有天都峯江
山佳麗地登臨苦忽忽塔燈落淮水寺樓倚霜空攜拾
著錦囊撫掌夸窮工歸轡不可挽思入孤征鴻洞天我
昔遊俛仰星一終士友歎契闊吏民念罷癯婆娑故將

軍白髮簿書叢足趼雖四方夢寐煙雨東歸田有脚力
尚往尋行蹤期君斬寒藤伴我搯枯筇

鍾山閣上望雨

天閣山長雨似煙忽然飛去暗平川
秔禾未實秬禾瘦不用廉纖便霈然

除夜

婪尾杯殘雪滿簪牀頭歷日費光陰
故山巧入忙中夢新歲尤關客裏心
烏鵲倦時三匝繞鷓鴣穩處一枝深

勞生佚老尋常事從政那堪力不任

元日

老來百味絮沾泥期會關身尚火馳幾夜鄉心歆枕處
今年脚力上樓時酒缸幸有乾坤大丹鼎何憂日月遲
莫道神仙無可學學仙猶勝簿書癡

體中不佳偶書

生平人比似維摩試比厓孱不啻過舊摘衰髯今雪偏
頻揩病眼轉花多從來世味聊復爾此去官身如老何

收拾頽齡加藥餌尚堪風月對婆娑

坐嘯齋書懷

時方治
振濟

老來窮苦事相違兀坐鈴齋竟日癡
眼目昏緣多押字胸襟俗為少吟詩
月侵燈影吏方去春徧梅梢官未知
直待食新方緩帶明朝騎馬過陵陂

寶公祈雨感應用陳申公韻賦詩為謝

撫原龜坼暮春時夾路爐薰共禱祠
喚起雲頭千嶂湧飛來雨脚萬絲垂
無情梅塢猶紅綻有意秧田盡綠滋

大施門開須滿願願均此施匝天涯

送徐叔智運使奉祠歸吳中

手種湖邊花百畝東風日夜催歸去當年辛苦種花時
不道白頭猶未歸君如肯過城南陌但向水雲紅處覓
煩呼猿鶴問平安當有畦丁解看客我今江船亦欲東
檝迎楓橋成兩翁壓枝萬朵雖過盡尚及巢龜蓮葉中

送舉老歸廬山

二千里往回似夢四十年今昔如浮去矣莫久留桑下

歸歟來共煨芋頭

題現老真

三十年來共葛藤如今蓮社冷如冰
茶瓜櫻筍遊山會從此齋廚欠一僧

致一齋述事

文書煙海困浮沉不覺盤跚百病侵
偶問客年驚我老忽聞鶯語歎春深
今朝麥粒黃堪麪幾日秧田綠似針
除却一犁春雨足眼前無物可關心

次韻楊同年祕監見寄二首

瘴雲嵐雨幾時歸，應把周南視九夷。
舊說鬼神驚落筆，新傳狐兔駭搴旗。
韶江石老簫音在，庾嶺梅殘驛使遲。
自古朱絃清廟具，莫貪鵬海看天池。

吾衰長愧接輿狂，忙裏何心領燕香。
塵土簿書憎鐵研，水雲蓑笠傲金章。
論文無伴法孤起，訪舊有情書數行。
何日却同湖上醉，露幃宵幄為君張。

曉起信筆

午枕汗如洗曉櫛氣稍蘇
莎蛩試風露滿意鳴相呼
倦客感節物流光不躊躇
秋聲已如許殘暑何足驅
人言今歲熱迴與常歲殊
此理恐未然豈不知頭顱
年年有三伏日日非故吾
婆婆今尚可後當彌不如
病骨須一涼未暇惜居諸
坐來有清思西風搖井梧

送曾原伯運使歸會稽用送徐叔智韻

秧田水滿麥棲畝勸農使者翩
然去去年愁苦救荒時
豈敢夢為今日歸天津橋西官柳陌
文書燈火長相見

江上信美不留人寂寞回潮工送客鏡湖一曲浙河東
萬頃太湖蓑笠翁願賡四愁作五詠我所思兮思剡中

王南卿母挽詞

櫛縱稱純孝笄珈蚤隱憂病中心已化身外世如浮聞
道悲風木誰能駐壑舟佳兒行古道足以貴潛幽

次韻鄭校書參議留別

年豐方共慶歲晚客他之吏事朝還暮人生合復離江
山殘夢破風月片帆移後會吾衰矣桑榆一繭絲

重九賞心亭登高

憶隨書劒此徘徊投老雙旌重把杯綠鬢風前無幾在
黃花雨後不多開豐年江隴青黃徧落日淮山紫翠來
飲罷此身猶是客鄉心却附晚潮回

寄題王仲顯讀書樓

嗜書如嗜酒知味乃篤好欲辨已忘言不為醒者道使
君青箱家文史衷懷抱平生名教樂雙旌不滿笑忽乘
雪溪興來擬秦淮棹丘亭客漂泊夜夜短檠照人云太

癡絕我自斲輪妙今朝檣竿起昨夢繞閭皂云有百尺
樓歸寄北窻傲滴露紉朱黃拂塵靜綳綵想當呻畢時
寧復羨騰趙古心千載事俗眼詎能料蕭灘富還往取
友必同調一張復一弛釀秫助歌嘯

荊樓

金陵出一種荊甚高園丁
結成樓塔或至一二丈

東籬秋色照踈蕪挽結高花不用扶淨洗西風塵土面
來看金碧萬浮圖

北門覆舟山道中

冉冉霜風掠弊貂簿書塵外訪漁樵
林煙色淡如濛雨塘水痕深似落潮
鴈字江天聞塞管梅梢山路欠溪橋
騎驢索句當年事歲暮騷人不自聊

送郭明復寺丞守蜀州

士進固未易退亦良獨難西州多故人
歸路常險艱有道獨行意郭舟若神仙
勿輕銀兔符傾倒金貂蟬唐安君昔遊
百萬蠲逋錢我亦常客夢醉歌采菱船
父老尚相記况君有前緣想見東西湖
恩波漲春瀾此地著經

濟紗籠相後先潭潭相業堂新題我所刊政為來者地
君行豈偶然去去進明德後日五四賢

元日謁鍾山寶公塔

雪後江臯未放春老來猶駕兩朱輪歸心歷歷來時路
官事驅驅病裏身未暇難窺尋古佛且防鶴帳怨山人
君看王謝墩邊地今古功名一窖塵

元日馬上二絕

泥絮心情雪樣髯詩囊羞澁酒杯嫌年來萬事都消滅

惟有牀頭歷日添

筋骸全比去年非
騎吹聲中憶釣磯
待得江風欺老病
何如閒健一蓑歸

春晚

荒園蕭瑟懶追隨
舞燕啼鶯各自私
窻下日長多得睡
尊前花老不供詩
吾衰久矣雙蓬鬢
歸去來兮一釣絲
想見籬東春漲動
小舟無伴柳絲垂

北窻偶書呈王仲顯南卿二友

官居故偏仄北窻誰所開胡牀憩午暑簾影久徘徊高
槐忽低昂知有好風來須臾墮几席篆香小飛灰病翁
亦披襟月露裛奇懷攏頭暴背耘水晝婦子偕不辭夢
山裂田水如潑醅去年豈堪說稻根已浮埃使君坐侯
宅窻間即涼臺何敢訴苦熱灑然助心齋

中秋清暉閣靜坐因思前二年石湖四明賞月

前年銀界接天迷去歲金盤湧海低漂泊相逢重一笑
秦淮東畔女牆西

玉麟堂會諸司觀牡丹醺醺三絕

東風微峭護餘春
紅紫香中酒自溫
不用忙催銀燭上
醺醺如雪照黃昏

洛園姚魏碧雲愁
風物江東亦上游
憶起遨頭八年夢
彭州花檻滿西樓

莫向花前惜酒杯
一年一度有花開
浮生滿百今強半
歲歲看花得幾回

重九獨坐玉麟堂

江上西風動所思又將清賞負東籬年年客路黃花酒
日日鄉心白鴈詩籠月秦淮無舊曲馳煙鍾阜有新移
人生笑口真稀闊況值官忙閔雨時

次韻舉老見嘲未歸石湖

半世吟客舍柳長年憶後園花為報廬山莫笑雲丘今
屬誰家

次韻曾仲躬侍郎同登伏龜樓二絕

帶東江淮翠岫園掌窺臺殿碧鱗差劉郎句裏登臨眼

壓倒三江二水詩

古來遊客謾西東
領會誰如我與公
露坐繩牀天不盡
絕勝簾雨棟雲中

題李雲叟畫軸兼寄江安楊簡卿明府二絕

蒼煙枯木共荒寒
籬落堤灣洶漲湍
歸路宛然歸未得
閒將李叟畫圖看

新圖來自雪邊州
皴石枯槎筆最遒
明府能詩如此畫
為渠題作小營丘

晨出蔣山道中

霜痕如雨沁東郊，樂歲家家一把茅。
故國丘陵多麥壟，新晴籬落有梅梢。
小山何在應招隱，北嶺如今已獻朝。
歸計未成聊琢玉，飄飄風袖作推敲。

有感今昔二首

陽春白雪雅音希，俚耳冬烘輒笑嗤。
麋見麗姬翻決驟，鳥聞韶樂却憂悲。
爛奚輕薄人何敢，伏獵荒唐自不知。
蚓竅蠅鳴莫嘲誚，彭亨菌蠢正當時。

飄風驟雨謾驚春
埽蕩何煩臂屈伸
天識不哀宜不怨
神歆非類即非仁
休離地下枯魚骨
且鬪尊前健犢身
靜看可憐還可笑
香山寧是幸災人

種竹歎向在成都
種竹滿西園
偶苦寒疾竭來金
陵復種繞池未幾
以眩卧閣家人子
遂謂不當種竹
其說甚可怪歎口
占此詩

宣華種萬竿
寒疾適相值
玉麟種千竿
偶復須藥餌
僮奴狙今昨
競道竹相崇
如將聖作狂
似以儒為戲
此君

來聲寬林神亦短氣我夢不平鳴霍然推枕起明當還
石湖賸種千畝地未論比封君且用執讒喙

公退書懷

昨日騰章奏發倉今茲飛檄議驅蝗四無告者僅一飽
七不堪中仍百忙皦日自能臨俯仰浮雲寧解制行藏
求田問舍亦何有歲晚倦遊思故鄉

石湖詩集卷二十二

欽定四庫全書

石湖詩集卷二十三

宋 范成大 撰

初秋二首

急雨過窓紙新涼生簟藤蹒跚老鈴下來炷壁間燈
壯歲故多病老年知不堪何須看公案只此是真參

蝙蝠

伏翼昏飛急營營定苦飢聚蚊充口腹生汝亦奚為

蛩

壁下秋蟲語一蛩鳴獨雄自然遭跡捕窘束入雕籠

四花

素馨間未利木犀和玉簪醫來都屏去頭眩怕香侵

謝範老問病

三椽一席度秋冬造化兒嬉困此翁帖有王書難治眩
文如陳檄不驅風骨枯似疥膚如腊髮織成毳鬢作蓬
點檢病身還一笑本來四大滿虛空

二偈呈似壽老

法法剎那無住云何見在去來若覓三心不見便從不見
打開

孟說所過者化莊云相代乎前何處安身立命飢餐渴
飲困眠

諾惺菴枕上

噩夢驚回曉枕寒青燈猶照藥爐邊紙窓弄色如朧月
又了浮生一夜眠

癸卯除夜聊復爾齋偶題

五夜燈花重東風角韻來雪慳衣未續春早句多梅寂
歷羅門亞溫曆藥鼎煨老嫌新歲換病喜舊星回鬱壘
先題版屠蘇後把杯書扉無健筆爆竹有寒灰餽牒牙
難膠椒盤眼倦開陳人仍憊卧身世兩悠哉

甲辰人日病中吟六言六首以自嘲

攢眉輒作山字啾耳惟聞水聲人應見憐久病我亦自
厭餘生

目慌慌蟻旋磨頭岑岑鼇負山筆牀久已均伏藥鼎何時丐閒

政爾榮枯衛蒞剛云人厄天窮歸咎四衝臨歲乞憐九曜過宮

復吉既愆七日泰來惟候三陽厯日今頒寅正占星更候農祥

有日猶嫌開牖無風不敢上簾報國丹心何似夢中抵掌掀髯

壯歲喜新節物老來惜舊年華病後都盧不問家人時
換瓶花

正月九日雪霰後大雨二首

夜霰三更碎瓦晝冥一陣翻盆賴是梅花已過不然皴
玉誰溫

黃昏簷溜垂瀑清曉屐聲滿門湖光萬頃何似小沼先
吹縠紋

正月十日夜大雷震二首

阿香真是健婦夜半鼓行疾驅直恐南山破碎絕憐寔
紙枝梧

人言有物司鼓春到揚桴發聲但要蟄蟲啓戶何須一
許震驚

吳燈兩品最高

鏤冰影裏百千光剪綵毬中一萬窻不是齊人誇管晏
吳中風物竟難雙

燈夕懷廣蜀舊事

灕水橋西列炬香
少城樓下變燈忙
兒嬉萬里客程遠
老懶一龕春夢長

上元紀吳中節物俳諧體三十二韻

斗野豐年屢吳臺
樂事并酒壚先疊鼓

歲後即旗亭先擊鼓不已以迎

節意燈市蚤投瓊

臘月即有燈市珍奇者數人醺買之相與呼盧來勝者得燈

價喜膏

油賤祥占雨雪晴
貧簷仙子洞

坊巷燈以連枝竹縛成洞門多處數十重

蒞

苜化人城

蓮花燈最多

檣炬疑龍見

舟人接竹桅檣之表置一燈望之如星

橋

星訝鵲成

燈橋

小家厖獨踞

犬燈

高閑鹿雙撐

鹿燈

屏展輝雲

母

琉璃屏風

簾垂是水精

琉璃簾

萬窻花眼密

萬眼燈以碎羅紅白相間砌成

工夫妙天下多至萬眼

千隙玉虹明

琉璃毬燈每一隙映成一花亦妙天下

蒼葡萄丹

房挂

梔子燈

葡萄綠蔓紫

葡萄燈

方縑繙史冊

生絹糊大方燈圖畫史冊故事

村人喜看

圓魄綴門衡

月燈

擲燭騰空穩

小毬燈時擲空中

推毬滾地

輕

大漆毬燈

映光魚隱見

琉璃壺瓶貯水養魚以燈映之

轉影騎縱橫

馬騎燈

輕薄行歌過顛狂社舞呈

民間鼓樂謂之社火不可悉記大抵以滑稽取笑

村

田叢笠野

村田樂

街市管絃清

街市細樂

里巷分題句

每里門作長燈

題好句其上

官曹別扁名

官府名額多以絹或琉璃照映

早船遙似泛

夾道陸行

為競渡之樂水傀儡近如水戲照
謂之划早船 鉗楮裝牢戶燈 嘲嗤

繪樂棚山棚多畫一時 堵觀瑶席隘喝道綺叢爭禁鑰

通三鼓歸鞭任五更桑蠶春繭勸春繭自臘月即入食次所以為蠶事之兆

花蝶夜蛾迎大白蛾花無貴賤悉戴之亦以迎春物也 鳧子描丹筆紅畫鴨子相餽

遺鷺毛剪雪英剪鷺毛為雪花與夜蛾並戴 寶糖珍粬粬健拍吳中謂之寶糖

鮭特為脆美 烏臙美飴烏臙糖即白錫俗言能去烏臙 撚粉團藥意子熬

桴膺膊聲炒糯穀以卜俗名字妻北人號糯米花 筵尊巫志怪香火婢輸

誠俗謂正月百草靈故帚葦針箕之屬皆卜焉多婢子之輩為之 筵卜拖裙驗弊帚繫

名瑞箕詩落筆驚

即古紫姑今謂之大仙俗名箕姑

微如針屬尾

以針姑卜

伺其尾相屬為兆名針姑

賤及葦分莖

葦莖分合為卜名葦姑

末俗難訶止佳

辰且放行此時紛僕馬有客靜柴荆幸甚歸長缺居然
照短檠生涯惟病骨節物尚鄉情倚撫成俳體咨詢逮
里忙誰修吳地志聊以助譏評

雪寒探梅

酸風如箭莫憑闌凍合橫枝雪未乾吳下得春元自晚
那堪天與十分寒

曉枕三首

煮湯聽成萬籟添被知是五更陸續滿城鐘動須臾後
巷鷄鳴

卧聞赤脚鼾息樂哉栩栩蘧蘧病夫心口相語何日佳
眠似渠

舒慘常隨天氣關心窓暗窓明日晏扶頭未起喚人先
問陰晴

不寐

春宵似暖非暖曉夢欲成未成風竹時驚雀噪月窓誰
伴梅橫

戲書二首

長病人嫌理亦宜吾今有計可扶衰煩君舁著山深處
恐有黃龍浴水醫

羣兒欺老少陵窮口燥脣乾髮漫衝顛沛須臾猶執禮
古來惟有一高共

耳鳴

風號高木水翻洪
歷歷音聞不是聲
一任大千都震吼
便從卷葉證圓通

案上梅花二首

南坡玉雪萬花團
舊約東風載酒看
冷落銅瓶一枝亞
今年天女亦酸寒

地爐火煖日烘窓
一夜花鬚半吐黃
鼻觀圓通熏百和
博山三夕罷燒香

古梅二首

孤標元不鬪芳菲
雨瘦風皺老更奇
壓倒嫩條千萬葉
只消疎影雨三枝

誰似西湖處士才
詩中籬落久塵埃
陸郎舊有梅花課
未見今年句子來

至昌為具賞東軒
千葉梅然梅尚未開

玉葉重英意已芽
新移竹外小橫斜
東齋何似春工晚
鐵樹已花梅未花

喜周妹自四明到

團樂話裏老龐衰一妹仍從海浦來孤苦尚餘兄弟樂
如今雖病也眉開

占星者謂命宮月孛獨行無害但去年復照作
災今年正月一日已出而歲星作福戲書二
絕

昔躔初度本除災何意重逢作病媒久住靈旂今日過
歷翁歡喜勸椒杯

暗曜加臨有救神煌煌福德自天仁只煩終惠蘓殘喘

官爵從渠奉董秦

題藥方

孤童亦復夢槐柯無德無功用福多天理乘除當老病
巢源王訣奈君何

園丁折花七品各賦一絕

單葉御衣黃

舟前鷺羽映酒塞上駝酥截肪春工若與多葉應入姚
家鴈行

水精毬輕盈嫵媚不耐風日

又名醉西施又名風嬌人名玉勝瓊

縹緲醉魂夢物嬌饒輕素輕紅若非風細日薄直恐雲

消雪融

壽安紅深色粉紅多葉易種且耐久

豐肌弱骨自喜醉暈粧光總宜獨立風前雨裏嫣然不
要人持

疊羅紅開遲旬日始放盡

裝積剪裁千疊深藏愛惜孤芳若要韶華展盡東風細

細商量

崇寧紅

勻染十分艷絕當年欲占春風曉起粧光沁粉晚來醉
面潮紅

鞞紅

猩脣鶴頂太赤榴萼梅腮弄黃帶眼一般官樣祇愁瘦
損東陽

紫中貴

沉沉色與露滴泥泥香隨日烘滿眼艷粧紅袖紫綃終
是仙風

聞春速牡丹盛開

東軒聞道有花開
癡坐三椽首設回
縱得好晴猶懶看
那堪風雨揭天來

蜀花以狀元紅為第一
金陵東御園紫繡毬為最
西樓第一紅多葉東苑無雙紫壓枝
夢裏東風忙裏過
蒲團樂鼎鬢成絲

喜雨

昨遣長鬚借踏車
小池須水引鳴蛙
今朝一雨添新漲
便合翻泥種藕花

嘲風

紛紅駭綠驟飄零
癡騃封姨沒性靈
報道海棠方熟睡
也須畱眼為渠青

大風

春晴雖好恨多風
到眼花枝轉眼空
晴不與花為道地

爭如雲淡雨濛濛

風止

收盡狂飈捲盡雲
一竿晴日曉光新
柳魂花魄都無恙
依舊商量作好春

苦雨五首

河流滿滿更滿檐
溜垂垂又垂皇天寧有漏處后土豈
無乾時

不辭蛾化麥穗巨
忍秧浮浪花兒孫
汨汰護岸翁媼扶

攜上車

折筍肥梅釘坐涎
蝸關蟻上梁雨工
莫賈餘勇留待稻
花半黃

潤礎纔晴又汗濕
薪未爆先煙壯夫
往往言病病叟岑
岑且眠

已厭衣裳蒸潤仍
憐書畫爛斑匳香
尚餘幾所盡付熏
鑪博山

謝龔養正送蘄竹杖

一聲霜曉謾吹愁八尺風漪不耐秋上座獨超三昧地

諾惺菴裏證般舟

釋氏謂常行為般舟三昧

寄題祝郢州白雪樓

楚望風煙倚繡楹使君靜治有高情祇應襦袴新翻曲
壓倒當年寡和聲

夏至二首

李核垂腰祝饅粽絲繁臂扶羸節物競隨鄉俗老翁閒
伴兒嬉

石鼎聲中朝暮紙窗影下寒溫踰年不與廟祭敢云孝
子慈孫

重午

熨斗薰籠分夏衣翁身獨比去年衰已孤葛淥十分勸
却要艾黃千壯醫蜜粽冰糰為誰好丹符綵索聊自欺
小兒造物亦難料藥裏有時生網絲

積雨作寒五首

壓屋雨雲晝暗環城霖潦夏寒西池半沒荷柄南蕩平

沉炎盤

已報舟浮登岸更憐橋塌平池養成蛙吹無謂埽盡蚊
雷却奇

熨帖重尋毳衲補苴盡護紙窓餘生雪鬢禪榻昨夢雲
帆漲江

婢喜蚊僵霧帳兒噴蝸篆風樵兀坐鼻端正白忘懷眼
底常青

山寒禪老不下泥滑琴僧罕來且喚園丁閒語喜聞湖

岸未顏

禪老範默堂琴
僧淨月師也

喜晴二首

驅帚水爭溝口卷簾日欵屋山飢燕癡兒叫怒拙鳩去
婦復還

窻間梅熟落簾牆下筍成出林連雨不知春去一晴方
覺夏深

子文大丞重午日走貺煮酒清甚殆與遠水一色
何其妙哉數語奉謝

臘脚清若空吾聞其語矣今晨品義尊公酒正如此太
常家有此段奇銷得不齎醉如泥但恨今無過雲曲送
我菖蒲一杯綠

子文舊有歌
者名過雲

子文見和云亦有小鬟能度曲復用韻戲贈

三年屏杯酌甚矣吾哀矣眼中有溜澠猶解商略此花
酒俱來事更奇不妨禪心絮沾泥翠眉何時真度曲細
意煩君畫蛾綠

石湖詩集卷二十三

欽定四庫全書

石湖詩集卷二十四

宋 范成大 撰

題請息齋六言十首

洞門畫挂鐵鎖閣道秋生綠苔著下略同龜伏瓜中且
免蠅來

多謝紛紛雲雨相忘渺渺江湖坐隅但忌占鵬屋上何
煩譽烏

灩澦年年似馬太行日日推車笑中恐有義甫泣裏難
防叔魚

見影蛾猶鈇鈇聞聲厖尚狺狺問誰毛生名紙知我角
出車輪

不惜人扶難拜非關我醉欲眠勞君敬枯木耳恐汝見
濕灰焉

稅駕今吾將老結廬此地不喧恐妨蝴蝶同夢笑倩顛
當守門

口邊一任醜去鼻孔將涕收閒門冷落車轍空室園
藥話頭

冷煖舊雨今雨是非一波萬波壁下禪枯達磨室中病
著維摩

親戚自有情話來往都無雜言酒熟徑須相報文成聊
與細論

園丁以時白事山客終日相陪竹比平安報到花依次
第折來

送劉唐卿戶曹擢第西歸六首

摩挲漢柱愴分襟
邂逅吳船喜盍簪
別久十年知幾夢
情親萬里只初心

學道何關紫與青
發身聊假佛名經
歸來解盡程書縛
千古文章似建瓴

槐黃燈火困豪英
此去書窻得此生
學力根深方蒂固
功名水到自渠成

中年親友惜分離
況我身兼老病衰
餘景庶幾猶及見

登瀛召客過門時

我識岷峨最上頭當年脚力與雲浮
兩山父老如相問一席三椽正卧遊

四海西州舊故多煩君問訊各如何
心期本自無南北

萬里天波一月波

未句戲用蜀語以見久要不忘之意

富順楊商卿使君鼎與余相別于瀘之合江沙

然再會之期後九年迺訪余吳門則喜可知
也今復分袂更增惘然病中強書數語送之

合江縣下初語離共說再會知何時壽標堂前哄一笑
人生聚散真難料青燈話舊語未終船頭疊鼓帆爭風
草草相逢復相送直恐送迎皆夢中昨聞親上安邊奏
玉陛從容移禁漏天香懷袖左魚符歸作雙親十歲壽
我今老病塘蒲衰君歸報政還復來萬里儻容明月共
更期後夢如今夢

久病或勸勉強遊適吟四絕答之

風月箇中老子江湖之上散人化鑪苦靳清福環堵閑

拋好春

鶴怨久迴俗駕鷗盟誰主
載書一丘一壑謝汝三歲三
秋望予

捫蝨即是忙事驅蠅豈非褊心
香煖香寒功課窓明窓
暗光陰

羸如薺婦多忌倦似田翁作勞
玩具僧梳剔屢歡棕丁
尾龜毛

初秋閒記園池草木五首

莢葵爛紫終陋蔭
葡萄嬌黃亦香醫
俗賸延竹色療愁
催折萱房

牛牽碧蔓自繞雞
聳朱冠欲爭菱葩
可範伯雅蓼節偏

宜翹生

菱葩為酒杯樣最
佳葉入翹為勝

旱地蓮花嬌小水
盆梔子幽芳薇帳
半年春艷桂叢四

季秋香

紫薇一名半年紅
品桂一種四季有花

醉憐金錢齊側卧
看玉簪對橫脰水
留灌米利結香旋

薰素馨

末利用治魚腥
水澆方多花

玉蕊化生稚子碧枝視現聲聞馬齒任藏汞冷鴻頭自

勝硫溫

謂孩兒蓮羅漢木馬齒莧中有水銀鴻頭芡實也芡性煖號水硫黃

巖桂三首

風簾疎爽月裴回悵望家人把酒杯病著幽窓知幾日
瓶花兩見木犀開

越城芳徑手親栽紅淺黃深次第開不用小山招隱賦
身如強健日千迴

一株蕭索倚宣華東苑香風屬內家丹碧屠蘇銀燭照

平生奇絕象山花

少城園中惟有一株建康東御園有亦不多四明丹桂特奇州宅所種尤

蔚茂常與魏丞相反飲其下

中秋無月三首

兒女無惊坐客稀今年孤負隔年期誰從天上牢遮月
不管人間大欠詩

撲地凝雲欲萬重家家簾幙護房櫳世間第一無情物
誰似中秋雨與風

一生露下風前客兩歲愁邊病裏身姑置陰晴圓缺事

藥寮燈火正相親

藻姪比課五言詩已有意趣老懷甚喜因吟病中
十二首示之可率昆季廣和勝終日飽閒也

舊歲連新歲涼牀又煖牀山川屏裏畫時刻篆中香畏
壘安吾土支離飽太倉若教身更健鶴背入維揚

認鹿紛紛夢亡羊散亂心多昏遮眼讀愁苦撚髭吟幸
覺行迷遠其如卧病深通身都放下何用覓砭鍼

日煖衣猶襲宵長被有稜朝晡三楪飯昏曉一缸燈伴

坐跏如几扶行瘦比藤生緣堪入畫寂寞憩松僧

繩倚扶拐骨蒲團閣痒膚事疑償業債形類窘囚拘空

劫真常體浮生幻化軀箇中元不二無語對文殊

軟熟羞盤饌芳辛實枕幃候晴先晒席占濕豫烘衣易

栗雞皮皴難培鶴骨肥頭顱雖若此虛白自生輝

數息憎晨清伸眉愜晚晴隙塵浮日影窓穴嘯風聲捫

蝨天機動驅蚊我相生偶然成一笑栩栩暫身輕

貴仕龜鑽筭閒居馬脫鞵冠塵昏舊製帶眼剩新圍堆

案書郵少登門刺字稀掩關灰木坐休示季咸機

目青浮珠珮聲塵籟玉簫秋懷潘鬢禿干夢楚魂銷注
水瓶花醒吹薪藥鼎潮南柯何處是斜日上廊腰

靜裏秋先到閒中畫自長門闌疑泄柳尸祝漫庾桑腹
已朽經筭身猶試藥方強名今日愈勃窣負東牆

汗漬筇枝赤苔封屐齒青有醫延上坐無客抗分庭霽
月鑽窓看鳴琴側枕聽莫嗔猿鶴怨岫幌兩年局

視絮勞羣從祇承愧闔家乳泉供水遞金液養丹芽加

釀厚如酪旋春香勝花百端扶老億無物報投瓜

學業荒呻畢歡悰隔笑鹽入秋先複幕過夏亦疎簾門
客嗔愁思家人獻吉占尤憐小兒女時報鵲鳴簷

贈臨江簡壽玉二首簡攜王仲顯使君書來謁并

示孔毅甫夢蟾圖今廟堂五府皆有題字

蕭灘遠客扣田廬貽我讀書樓上書千里故情元共月
錯云多病故人疎

卷中圖畫袖中珍上有三階五朵雲白日青天光範路

未饒蟾窟夢紛紜

壽標前假山成移丹桂於馬城自嘲

堂前趣就小嶙峋未許蹢躅杖屨親更遣移花三百里
世間真有大癡人

灼艾

血忌詳涓日尻神謹避方艾求真伏道穴按古明堂謝
去羣巫祝勝如幾藥湯起來成獨笑一病攪千忙

東宮壽詩

甲觀秋彌月前星蚤麗天君親重慶日家國中興年英
武神機遠溫文德宇全摘章森典則會道極高堅儉實
躬安履仁端性自然淵冲澄有量海潤浹無邊五學臨
函丈三朝拱邃延頌聲敷政久喜色問安還銅律諧初
度柔弧絕舊傳菊催重九近梅占小春先戲綵倚蘭殿
宣杯玳瑁筵青宮千億壽長對兩宮前

十月朝開爐偶書余病歸二年未能拜埽松楸最
常以此日侍先兄遊洞庭并寫悲感之懷

圃芋今年紫籬楓昨日丹開爐修故事聽雨說新寒橘
社重遊阻楸行再拜難此時西望眼哀涕不勝彈

有懷龔養正

好在楚龔子秋來情話稀昨承書素說行侍板輿歸烟
水潮平棹風霜歲晚衣幾時真訪戴莫待雪花霏

白髭行

四十踰四髭始黃手持漢節臨大荒與疾歸來皮骨在
兩鬢尚作青絲光俛仰行年四十九萬里南馳復西走

斑斑頷下點吳霜猶可芟夷誑賓友屈指如今又十年
兩年憊卧愁風前人生血氣能幾許不待覽鏡知皤然
長安後輩輕前輩百方染藥千金賣煩攢包裹夜不眠
無奈霞頭出光怪病翁高卧門長扃雪瑤瑤骨更清
兒童不作居士喚喚作堂中老壽星

但能之提刑相別十年自曲江遠寄二詩叙舊良
厚次韻為謝亦以首章奉懷略道湘南分攜故
事末篇自述年來衰病不復故吾也

憶昔騁鸞識俊英，朱幡繡斧盡能名。
書隨庾嶺一枝寄，句挾韶江九奏成。
吳粵交馳清夜夢，參辰不隔故人情。
何時重醉金槽曲，一洗陽關別恨平。

落拓虛似瓠，壺新添雪鬢與雙鬚也。
知病叟形容變，非是仙儒骨相癯。
歲晚山林如自獻，年豐田野亦多娛。
無端拙恙妨清樂，未許扁舟到五湖。

復以蟾硯歸龔養正

夢裏何人歌式微，覺來石友在書幃。
鄭環信美非吾寶，

趙壁猶全任汝歸
渴水雙蟾窺海闊
出雲孤月照星稀
好將自草三千牘
莫與蚍蜉作釣磯

大雪書懷

天將奇賞發清歡
疇昔登臨插羽翰
梅下尋詩騎馬滑
松梢索酒倚樓寒
閉門老子愁無賴
返棹歸來興已闌
聊掬玉塵添石鼎
自煎魚眼破龍團

雪中苦寒戲嘲二絕

冥凌分職大間關
辛苦行冬強作難
費盡無邊風與雪

劣能供得一番寒

茸氈帳下玉杯寬香裏吹笙醉裏看風雪過門無入處
却投窮巷覓袁安

雪復大作六言四首

奇寒擁被曉枕噩夢披蓑晚江遙想漫天匝地近聽穿
幔鳴窓

釀成送臘三白功在迎年九秋樵指擔肩相賀飯囊酒
甕何憂

初報折篁搶地旋聞壓柳堆橋寧教風過掀舞可惜雨
來半銷

伶俖凍雀蹲晚噤滲疎梅鎖春有客典衣沽酒何人增
價賣薪

立春

乙巳

綵勝金旛夢裏茶槽樂杵聲中索莫兩年春事小窓卧
聽東風

題徐熙風牡丹二首

紫花

藥珠仙馭曉驂鸞道服朝元露未乾
天半剛風如激箭
綠綃飄蕩紫綃寒

白花

寒入仙裙粟玉肌無餘全不耐風吹
從教旅拒春無力
細看腰支嫋嫋時

題黃居宋雀竹圖二首

居宋荃之子

羣雀歲寒保聚兩鶉日晏忘歸草間
豈無餘粒刮地風

號雪飛

蔓花露下凝碧叢竹秋來老蒼噪雀羣爭何事公禽自
轉清篁

題張晞顏兩花圖二首

晞顏廣漢人
趙昌之甥

繁杏

紅粉團枝一萬重當年獨自費東風若為報答春無賴
付與笙歌鼎沸中

玉梨


雪薄冰輕不耐春雨中愁緒月中真莫教夢作雲飛去
留伴昭陽第一人

題范道士二牛圖

道士處州人號范牛中年狂顛人傳其得道此圖自稱中興道

士范子珉蓋未顛時所作尤為精妙

西疇滌場淨無塵原頭遠牧秋草春一牛疾行離其羣
一牛返顧如怒嗔目光炯炯矜而馴點綴毫末俱逼真
不顛不狂筆有神妙哉吾宗散仙人



石湖詩集卷二十四

欽定四庫全書

集部

石湖詩集卷二十五至
七

詳校官庶吉士臣陳若霖

主事臣呂雲棟覆勘

總校官庶吉士臣何思鈞

校對官編修臣勵守謙

謄錄監生臣蔣繼煥

欽定四庫全書

石湖詩集卷二十五

宋 范成大 撰

小峨眉 并序

近得靈壁古石絕似大峨正峰名之曰小峨眉東坡
常以名廬山恐不若此石之逼真也作小峨眉歌以
夸之

三峨參橫大峨高奔崖側勢倚半霄龍跼虎卧起且伏

旁睨沫水沱江朝禹從岷嶓過其下奠山著籍稱雄豪
告成歸來兩階舞泗濱錫貢備九韶覽觀此石三歎息
髣髴蜀鎮俱名堯惜哉擊拊墮冀虛輦送淮海還山椒
降商訖周謹呵護磬氏無敢加鐫彫劉項蝸爭鬪靈壁
血漂川谷流腥臊水官恐此被染沅羶包席裹吳中逃
市門大隱閱千祀苔衣塵網羶孤標尤物顯晦定有數
昨者惠顧不待招我昔西遊踏禹迹暑宿光相披重貂
十年境落卧遊夢摩挲壁畫雙鬢凋天憐愛山欲成癖

特設奇供慰寂寥恍然坐我寶巖上疑有太古雪未消
嵌根巖積巧入妙峰頂箕踞貴不驕爐煙雲浮布銀界
隙日虹貫凝金橋是時歲杪卧衰病健起放杖驚兒曹
龍鍾繞圍喜折屐通手拂拭寒侵袍太湖未暇商甲乙
羅浮天竺均鴻毛小峨之名神所畀永與野老歸漁樵
作詩賀我得石友且以併賀茲丘遭

煙江疊嶂

煙江疊嶂太湖石也鱗次重複巧出天然王晉卿嘗

畫煙江疊嶂圖東坡作詩今借以為名此石里人方氏所藏故物非近年以人功雕斲者比尤可貴

太湖嵌根藏洞宮槎牙石生齋淪中波濤投隙漱且嚙
歲久缺罅深重重水空發聲夜鏜鎔中有晴江煙嶂疊
誰歟斷取來何時山客自言藏奕葉江上愁心惟畫圖
蘇仙作詩畫不如當年此石若並世雪浪仇池何足書
我無俊語對巨麗欲定等差誰與議直須具眼老香山
來為平章作新記

天柱峰

天柱峰英石也一峰峭豎特起有昂霄之意天柱本在衡山自黃帝時即以潛山輔南岳漢氏因之遂寓其祭於潛天柱山衡潛蓋皆有天柱而潛名特彰九華鴈蕩若他山亦皆以此名峰不足算也

衡山紫蓋連延處一峰巉絕擎玉宇漢家憚遠不能到寓祭潛山作天柱我今卧遊長揜關却寓此石充潛山形摹三尺氣萬仞世間培塿何由攀南州山骨孕清淑

乳孽砂牀未超俗神奇都賦小崢嶸雷雨飛來伴幽獨
哦詩月明清夜闌坐看高影橫屋山摩霄拂雲政如此
吾言實夸誰敢刪

甲辰除夜吟

一年三百六十日日日三椽卧衰疾旁人揶揄還歎咨
問我如何度四時我言平生老行李蓐食趑程中夜起
當時想像閉門閒弱水迢迢三萬里如今因病得疎慵
脚底關山如夢中重簾複幕白晝靜戶外車馬從西東

若問四時何以度念定更無新與故瓶花開落紀春冬
窻紙昏明認朝暮行年六十是明朝不暇自憐聊自嘲
婪尾三杯餞一櫟從今身健齒牙牢

次韻龔養正送水仙花

色界香塵付八還正觀不起况邪觀花前猶有詩情在
還作凌波步月看

元日

屋角崢嶸斗柄移案頭蕭索燭花垂與時消息評新藥

若節春秋憶舊詩飢飯困眠全體懶風餐露宿半生癡
尊前現在休嫌老最後屠蘇把一卮

正月六日風雪大作

滕六無端翼二癡翻天作惡破春遲邀梅勒柳何功業
誰與停杯一問之

奇寒何事入芳辰不管燈枝欲試新即日反風吹盡雪
東君已費一分春

元夕四首

粉痕紅點萬花攢玉氣珠光寶月團簾箔通明香似霧

東君無處著春寒

謂吳中剪羅琉璃二燈

不夜城中陸地蓮小梅初破月初圓新年第一佳時節
誰肯如翁閉戶眠

藥爐湯鼎煮孤燈禪版蒲團老病僧兒女強修元夕供
玉蛾先避雪鬢髻

落梅穠李趁時新枯木崖邊一任春尚愛鄉音醒病耳

隔牆時有賣錫人

謂唱賣烏膩糖者

去年多雪苦寒梅花遂晚元夕猶未盛開

隔年寒力凍芳塵勒住東風寂莫濱只管苦吟三尺雪
那知遲把一枝春燈烘畫閣香猶冷湯煖銅瓶玉尚皴
花定有情堪索笑自憐無術喚真真

寄題筠州錢有文明府新昌小道院

忠厚平生心學敏明隨處民功江左幕中荒政江西縣
裏仁風

勿云私淑小邑可以匹休大邦健筆誰能後賦向來江

夏無雙

題徐熙杏花

老枝當歲寒芳蘼春澹泞霧綃輕欲無嬌紅恐飛去

題趙昌木瓜花

秋風魏瓠實春雨燕脂花綵筆不可寫滴露勻朝霞

題易元吉獐猿兩圖二首

擇食麋相喚無人意不驚猿啼風動葉機熟兩忘情
鳥逐山公噪驚麋仰望疑春林無一事猶猿自生悲

題張希賢紙本花四首

牡丹

洛花肉紅姿蜀筆丹砂染生綃多俗格紙本有眞艷

常春

染根得靈藥無時不春風倚闌與挂壁相伴歲寒中

紅梅

酒力欺朝寒潮紅上粧面桃李漫同時輸了春風半

雞冠

號名極形似摹寫與真逼聊以畫滑稽慰我秋園寂

喜沈叔晦至

澹若論交味嚶其求友聲江湖幾魚沫風雨一雞鳴舊
事休重說新詩莫細評煩將憶勤夢歸對海山橫

驚蟄家人子輩為易疎簾

二分春色到窮閭兒女祈翁出滯淹幽蟄夜驚雷奮地
小窓朝爽日篩簾惠風全解墨池凍清晝賸縈雲笈籤

親友莫嗔情話少向來屏息似龜蟾

韓尚書新造
雲笈七籤

信筆

天地同浮水上萍義城迭耀案頭螢山中名器兩芒屨
花下友朋雙玉瓶童子昔曾誇了了主翁今但諾醒醒
歸田贏得多無事輸與諸公汗簡青

請息齋書事三首

覆雨翻雲轉手成紛紛輕薄可憐生天無寒暑無時令
人不炎涼不世情栩栩算來俱蝶夢啾啾能有幾雞鳴
冰山側畔紅塵漲不隔瑤臺月露清

刻木牽絲罷戲場
祭餘雨後兩相忘
門雖有雀尚廷尉
食已無魚休孟嘗
蟲裏趨時真是賊
虎中宣力任為狼
籬東舍北誰情話
鷄語鷗盟意却長

聚蚶醢邊鬧似雷
乞兒爭背向寒灰
長平失勢見何晚
栗里息交歸去來
休問江湖魚有沫
但蘄雲水鶴無媒
巖扉岫幌牢扃鑰
不是漁樵不與開

送文季高倅興元

素衣京洛悵成縉
青鬢江吳喜未絲
燭暗不眠談舊事

酒闌作惡問行期
琴書情話須親戚
風雨殘春更別離
屈指歸來重一笑
埽除門巷著旌麾

書懷二絕再送文季高兼呈新帥閻才元侍郎

劔關雲棧守非難
函谷泥封久未刊
今日漢中誰國士
莫教春草上齋壇

西出陽關有舊知
薰風淥水泛蓮時
煩君傳語詩書帥
更寄臺城別後詞

寄題石湖海棠二首

手開芳徑越城頭紅錦屠蘇結綺樓
不把萬枝銀燭照淡雲微月替人愁

老懶居家似出家園林春色雨沾沙
海棠尚自無心看天女何須更散花

家人子輩往石湖檢校暮歸

南浦回春棹東城掩暮扉
兒修雞柵了女挈菜籃歸
風力雖欺酒花香尚染衣
哀翁牢守舍腸斷釣魚磯

枕上聞蒲餅焦

曉寒燕雀噤春陰珍重清簧度好音
窓色熹微欹枕聽
夢成舟樣竹溪深

石湖芍藥盛開向北使歸過維揚時買根栽此因
記舊事二首

竹西歌吹荻花秋遺老垂淚送遠遊
羌笛夜闌吹出塞
當年如此夢揚州

萬里歸程許過家移將二十四橋花
石湖從此添春色
莫把蒲萄首肯誇

次韻龔養正中秋無月三首

詞客幕天清露下老翁卧病破窓中高吟大醉輸公等
不見常娥與我同

去年怪雨無端甚今歲癡雲亦復然減却新詩酸却酒
乘除添得一更眠

丙夜清光些子見兒童驚喜強雄夸闌珊高興應無幾
恰似春殘看落花

殊不惡齋秋晚閒吟五絕

好風入簾圖畫響斜照穿隙網絲明檐閒雙雀有時鬪
壁下一蛩終日鳴

旁若無人鼠飲硯麾之不去蠅登盤天涼睡起枕痕煖
日晚慵來香字寒

就食遷居蟻墳壞隨風作舍蛛裊絲百年何處用三窟
萬事信緣安一枝

市聲洶洶鼓催陣日影駸駸潮漲痕消磨意氣默數息
把翫光陰牢閉門

中秋昨已等閒過重九今還如夢來
霜鬢數莖羞墮幘
黃花三度笑空杯

老陳道人自云夢被召作地上主者又常受一貴
家供祝之曰他日必來吾家作兒戲贈小頌

野人何苦赴官差符使追呼撓道懷幸有子門香積供
不如隨喜去羅齋

題張戡蕃馬射獵圖

陰山磧中射生騎馬逐箭飛如脫兔割鮮大嚼飽何求

荐食中原天震怒太乙靈旗方北指犁轡逃歸莫南顧
漢家飛將李將軍馬蹄行踏燕然路

題趙昌四季花圖

海棠梨花

醉紅睡未熟淚玉春帶雨阿環不可招空寄凭肩語

葵花萱草

衛足保明哲忘憂助歡娛欣欣夏日永媚我幽人廬

拒霜旱蓮

霜天木芙蓉陸地早蓮草水花雲錦盡不見秋風好

梅花山茶

月淡玉逾瘦雪深紅欲燃同時不同調聊用慰衰年

乙巳十月朔開爐三首

石湖今日開爐紙窻銀白新糊童子燒紅榾柮老翁睡
煖糴瑜

石湖今日開爐兩壁仍安畫圖萬事篆煙曲几百年耗
衲團蒲

石湖今日開爐俗家恰似精廬
杖涕雖無情緒吟詩却有工夫

有歎二首

春秋蘭菊殊調南北馬牛異方
心醉井蛙海若眼空鵬海鳩枋

貧富交情乃見炎涼歲序方成
越秦本異肥瘠魯衛何曾弟兄

留簡伯俊

我昔賦遠遊萬里無親朋惟君同懷抱相從共茵憑踰
嶺穿瘴茅捫參倚枯藤隨行一瓶鉢澹如雲水僧火馳
炎熱場見此玉壺冰東歸常愧君無力相引繩長材屈
小邑果以循吏稱豈不有薦墨翩然支郡丞五溪在何
許水駛山峻增漫仕不擇地搏扶笑鯢鵬獨有故意長
問疾訪姜肱疊疊談昨夢一一記吾曾中年畏離別況
我雪鬢髻此意君自解少畱對青燈

枕上有感

寔明似月曉光新被煖如薰
喘息勻衝雨販夫牆外過
故應嗤我是何人

夜坐有感

靜夜家家問戶眠滿城風雨驟
寒天號呼賣卜誰家子
想欠明朝糴米錢

十月二十六日三偈

聲聞與色塵普以妙香薰
昔汝來迷我今吾却戲君
有箇安心法無時不可行
只將今日事隨分了今生

意外塵塵事
意中夢夢身
既知身是夢
一任事如塵

石湖詩集卷二十五